

«Sü là gaiina!»

Pella seguonda jada dûrant seis temp sco cusglier guvernativ presidiescha Jon Domenic Parolini (AdC) quist on la Regenza grischuna. Il 2024 es ün on festiv: il Grischun festagiàrà ils 500 ons dal Stadi liber da las Trais Lias. La FMR ha discurrü cun Parolini davart seis on presidial, davart seis desch ons illa Regenza ed il Term Bel.

Pel mumaint nu riva il cusglier guvernativ Jon Domenic Parolini da far grondas turas cun skis. El s'ha feri a Nadal vi d'un schnuogl tras ün pitschen acciaint sün pista. Ed istess es Jon Domenic Parolini da bun anim per la partenza da quist on presidial 2024.

FMR: Jon Domenic Parolini, vairamaing pudess El ir quista stà in pensiun, davo il 65avel anniversari. Quai füss bain ün impissamaint attractiv?

Jon Domenic Parolini: (ria) Plü bod vava adüna in testa il 2024 sco on da mia pensiun. Ed uossa suna qua: frisch e san, fich motivà ed elet per amo traïs ons sco cusglier guvernativ. Uschè ch'eu m'allega da presidiar quist on la Regenza ed eu fetsch ferm quint da lavur amo sco regent fin a la fin da la legislatura dal 2026.

Quist on 2024 es il deschavel on in uffizi sco cusglier guvernativ. Che ha müdà dûrant quist decenni?

Eu n'ha pudü ramassar bleras bunas experienzas – forsa tanteraint eir da quelles main bunas. Ma eu n'ha pudü imprender bler, per exaimpel co cha'l Chantun e si'administraziun funczian. Aint illa Regenza vain nus ün fich bun clima da laver. Ed eir i'l de-partament possa collavurar cun blera glieud fich motivada.

Però in quists ultims desch ons es capitè enorm bler: corona ha miss sül cheu il minchadì, la müdada dal clima s'accentuescha, la digitalisaziun avanza, las uondas da fügitivs, la mancanza da personal ... – Es il muond dal 2024 ün oter co quel dal 2014?

Schi, id es capitè bler. Dal 2014 nu d'ei ran quistas tematicas e crisas amo cunt schaintas. Impustüt han uossa las guerras actualas ün'influenza directa o indirecta sül Grischun, sco la situaziun da fügitivs. Ma eu pens cha güst nos Chantun haja eir impreis bler. Nus savain uossa co chi'd es da reagir per exaimpel cun catastrofes da la natüra sco a Bondo o cullas masüras da protecziun in connex culla pandemia. Sco Regenza vain nus dûrant corona suuent stuvü decider fich svelt e cumbatter per noss interest, sco cun l'avertüra da las pendicularas.

Per la seguonda jada president da la Regenza

Il cusglier guvernativ Jon Domenic Parolini (64) da Scuol/Cuoira es gnü elet ils 14 da güm 2023 a Clostra (sessiun extra muros) sco president da la Regenza grischuna per l'on 2024. L'antier ind-schegner forestal, capo cumünal da Scuol e deputà al Grond cussagl d'eira gnü elet ils 18 da mai 2014 sco cusglier guvernativ. Ils prüms quatter ons d'ei'r stat parsura dal Departament d'economia publica e fats socials. Da-spöi il 2019 es el il regent responsabel dal Departament per educaziun, cultura e protecziun da l'ambiant. Fingià dûrant l'on 2019 vaiva Jon Domenic Parolini presidià üna prüma jada la Regenza grischuna. (fmr/dat)



In settember 2023 ha la Regenza grischuna fat in globo üna spassegiada sül Term Bel/Dreibündenstein per far là la fotografia uffiziala dal gremi dal 2024. Da scheinster: Carmelia Maissen, Marcus Caduff, Jon Domenic Parolini, Martin Bühlér e Peter Peyer.

fotografia: Chantun Grischun

Daja in general plü suvent ün «stadi d'alarm», ingio chi'd es da reagir?

Quai as poja schon dir. Güst dûrant la pandemia haja dat bleras sezzüdas urgäintas, minchatant eir la dumengia. Eu am record amo dad üna dumengia sün üna tura da skis sül Piz Champatsch in Val Tuoi. Dûrant üna posa n'haja guardà sül telefonin. E baincomal d'eira gnü clomà ad üna sezzüda – il davomeddi stuava esser oura Cuoira. Talas sezzüdas cun decisius urgäintas haja dat plüssas jadas. Ma intant s'ha calmada la situaziun.

El ha passantà eir mumaints main agreabels dûrant quists ons sco regent, cumbinats cun üna o l'otra not sainza sön: Iis rimprovers in connex cul scandal da cartel, dal 2018 es El gnü reelet cun be 31 vuschs avantag, quatter ons plü tard ha El fat la reeleciun cun bravüra. Che ha Jon Domenic Parolini impreis in quists ons?

Quai sun natüralmaing stattas circunstanças fich specialas. Schabain ch'eu n'ha adüna comunichà avertamaing e transparentamaing, fingià a partir dal 2014, avant mi'eleciun illa Regenza. Ma causa ils rapports da medias dal 2018 haja lura dat üna nouva dinamica chi nu's vain plü dad influenzar. In talas situaziuns resta da sperar d'avair il sostegn da quella glieud chi cugnuoscha bain las circunstanças. Perquai suna fich grat dad avair adüna gnü ün grond sostegn illa regiun chi cugnuoscha a mai, mia laver ed eir las circunstanças in connex cun quist scandal. Il chantun Grischun ha intercurrü manüdamaing tuot la tematica, sainza chi's vess pudü far ün imbüttamaint invers mai e mia laver. Perquai esa üna gronda satisfacziun ch'eu sun gnü reelet il 2022 cun 10000 vuschs daplü co amo quatter ons avant.

Seis prüm on sco president da la Regenza es stat il 2019, dimena cuort da vo cha'l scandal da cartel ha procurà per lingias grassas. Fingià be la partenza in quist seguond on presidial sarà ün'otra?

Bain, la laver resta la medemma – id es da rapreschentar il Chantun e da manar las sezzüdas da la Regenza. Mo natüralmaing esa uossa ün bun sentimaint ed eu giold l'uffizi da president.

Che es stat o sarà il prüm act ufficial sco president?

Il prüm act ufficial es vairamaing stat ün e-mail. Eu n'ha scrit ils giavüschs da «bun on» a tuot las collavuraturs e tuot ils collavuraturs da l'administrati-

ziun chantunala. S'inclegia n'haja eir rendü attent al giubileum cha nus festa-gain quist on, ils 500 ons dal Stadi liber da las Trais Lias. E prosmamaing cu-mainza lura il WEF a Tavo, ingio ch'eu n'ha eir amo l'occasiun da tegner ün pled da bainvgnü pro'l Swiss Personalities Dinner.

Il giubileum da 500 ons da las Trais Lias es dimena ün dals accents da Seis on presidial. Che po il Grischun dad hoz vairamaing imprender da la reunion da l'on 1524?

Eu sper cha blera glieud as lascha sensibilisar d'ingiander cha nus gnin. Id es schon impreschiuant che chi'd es capitè in quels ons 1524/25. Las Trais Lias sun stattas fich progressivas sco unità democratica e solidarica – ed id es stat remarchabel chi s'ha perfin surla-schà als singuls cumüns la decisioen confessiunala. Il Grischun es stat avant-gardistic quella jada. Las regiuns s'han unidas per far valair lur drets in üna regiun alpina cun importanza strategica.

Quai po sgür valair eir hoz sco exaimpel

– da s'unir adonta da tuottas differenzas

confessiunalas, linguísticas e culturais.

A la fin es quell'unun stattà ün mo-

del da success, e da quai esa sgüra bun

da's render conscient eir hoz.

Quasi sco act simbolic ha El rablà l'intera Regenza sül Term Bel tanter Veulden e Brambrüesch – il crap da cunfin tanter las traïs lias grischunas. Là vais laschà far la fotografia da la Regenza da quist on.

Bain cler, quai es statta mi'idea. Eu n'ha dit a meis collegas ed a mia collega: «Sü là gaiina! Là faina nossa fotografia da la Regenza pel 2024!» Fingià la stà passada vaiva fat üna «reco» cul velo sül Term Bel. A la fin vaina lura propi fat in settember insemel üna spassegiada da circa ün'ura dal Culm Ault fin sün quell la collina. Üna bellezza! E s'inclegia es il Term Bel ün lö simbolic per quist on da giubileum.

Tuornain aval – in Seis departament, pro l'Uffizi da cultura daja müdadas. La manadra da l'uffizi banduna il post. Ed apparaientamaing vain l'uffizi eir reorganisà leivamaing. Cura vain comunichà in chosa?

Barbara Gabrielli es in uffizi amo fin la fin da lügl da quist on. Ella prepararà eir amo il seguond concept da promozion da cultura chi dess entrar in vigur dal 2025. Sia successiun elegiarà la Regenza lura previsiblamente i'l decours dal favrer o marz. Concernent la reorganisaziun daja üna müdada in quel sen-

cha la promozion da cultura nun es plü suottamissa directamaing a la manadra d'uffizi, dimpersè fuorma ün'aigna partiziu, manada uossa dad Andrea Conrad chi cugnuoscha, sco substitut fin qua per quella partiziu, fingià fich bain la promozion da cultura i'l Grischun.

Tractandada es prosmamaing pro Seis departament eir la revisiun da la ledescha da la scoula populara. Ün punct important es da valurisar la scoulina e d'augmentar las pajas da las muossadas e dals muossaders.

Hai, quai es güst. Ed id es ün pass neces-sari, perquai cha nus stuavain dozar las pajas in conguil cullas pajas i'l chan-tuns vaschins da la Svizra orientala. Ma nus stuavain eir far adattazius pro las pajas in general illa scoula populara. Daspera cumpiglia la revisiun però eir amo oters punts importants, sco la dumonda da l'integrazion respectiva-maing separaziun, la scoula d'ospidal ed oter plü.

Gaiin darcheu in muntona: El fa gugent gitas culs skis in muntongas. Ma pel

mumaint ha'L dad ir per part cun crotschas?

Schi, eu n'ha giodü dad ir culs skis dûr-ant ils dis da Nadal. Ma deplora-blamaing n'haja fat ün pitschen acciaint sulla pista chi maina giò la val. Ed uossa esa da schaniar il schnuogl schnester, però i va eir sainza crotschas.

Istess po'L sgür dar ün tip presidial: Sün chenün piz esa dad esser stat sco buna Grischuna o sco bun Grischun? – Sün Term Bel?

Cler, il Term Bel es ün bel lö. Ma i dà amo blers oters bels punts in Grischun. Eu sun natüralmaing il plü su-vent in gir in Engiadina Bassa. Üna bella gita as poja far al süd da Tarasp, illa Val Zuort, sül vadret süsom la val e lura ir fin sül Piz Zuort. Avant duos ons vai-na gnü sün quella tura relazioni fasci-nantas, cun üna puolvrà da bellezza. Ma i dess amo blerischmas otras gitas chi's pudess cusglier. Lain sperar cha avant la fin da la stagion d'inviern saja la ferida al schnuogl darcheu guarida!

Intervista: David Truttmann



Jon Domenic Parolini (AdC) es uossa il deschavel on illa Regenza. Fingià dal 2019 vaiva el presidià il gremi.

fotografia: Chantun Grischun